

24 AUG 2003

Gerakan-Deklarasi/I

GERAKAN LULUS DEKLARASI KHAS TERIMA KASIH KEPADA DR MAHATHIR

KUALA LUMPUR, 24 Ogos (Bernama) -- Gerakan hari ini meluluskan satu deklarasian khas merakamkan penghargaan ikhlasnya terhadap Perdana Menteri Datuk Seri Dr Mahathir Mohamad atas sumbangan besar dan tidak terhingga beliau kepada negara sepanjang dua dekad lepas.

Dr Mahathir akan bersara Oktober ini.

Ia terkandung dalam deklarasian 10 perkara yang diterima Persidangan Perwakilan Kebangsaan Gerakan ke-32 di sini yang dirasmikan Dr Mahathir sebagai Pengerusi Barisan Nasional (BN) semalam.

Gerakan, parti komponen keempat terbesar BN, juga mengesahkan satu deklarasian menyokong Timbalan Perdana Menteri Datuk Seri Abdullah Ahmad Badawi sebagai bakal Perdana Menteri.

Speaker persidangan itu Datuk Dr Chin Fook Weng berkata semua resolusi itu dilulus sebulat suara oleh para anggota perwakilan semasa dibentangkan.

Persidangan itu juga meluluskan resolusi bagi Gerakan memberi komitmen untuk menjadikan Wawasan 2020 dan Bangsa Malaysia sebagai perkara yang diperjuangkan parti sepanjang perjalanan ke tahun 2020.

Ia menggesa anggota parti mengajak semua rakyat Malaysia menerima satu regim mental yang memberi tumpuan kepada mencapai kecemerlangan, pembaharuan, merealisasikan pencapaian diri dan membaiki yang berterusan.

Para anggota perwakilan juga bersetuju untuk melakukan usaha membantu Malaysia mencapai status sebuah negara maju dengan komitmen kukuh terhadap kedaulatan undang-undang, amalan demokrasi, nilai moral dan etika, dasar ekonomi dan sosial yang adil, persamaan hak jantina, menegakkan hak asasi manusia dan pentadbiran kerajaan yang baik.

Mereka juga menyatakan komitmen untuk menggalakkan pembelajaran sepanjang hayat terutama kepada rakyat Malaysia dewasa yang tiada kemahiran dengan menawarkan peluang saksama dalam pendidikan dan akses kepada latihan serta perkembangan peribadi.

Perkara lain dalam deklarasian yang diluluskan itu termasuk, bantahan kepada semua bentuk ekstremisme perkauman dan agama, chauvinisme dan semua tindakan keganasan.

Para anggota perwakilan juga menyatakan sokongan mereka bagi program, projek dan usaha membaiki dan meningkatkan hubungan antara kaum dan menggalakkan perpaduan nasional.

Mereka juga mengisytiharkan komitmen terhadap mengukuhkan pertubuhan dalaman parti dan peningkatan imej Gerakan.

Persidangan itu juga menyuarakan sokongan tidak berbelah bagi terhadap kepimpinan parti untuk melaksanakan langkah yang perlu membimbing Gerakan ke dalam abad 21.

Mereka turut menerima Pelan Tindakan Gerakan bagi 2003 yang antara lain bertujuan menggerakkan usaha memerangi rasuah, politik wang, pentadbiran yang lemah dan gejala buruk lain yang menggugat negara.

-- BERNAMA

AT HS RON